



13 Jun 2016
13 June 2016
P.U. (A) 166

WARTA KERAJAAN PERSEKUTUAN

FEDERAL GOVERNMENT GAZETTE

KAEDAH-KAEDAH CUKAI PENDAPATAN (POTONGAN BAGI PELABURAN DALAM AKTIVITI YANG LAYAK) 2016

INCOME TAX (DEDUCTION FOR INVESTMENT IN QUALIFYING ACTIVITY) RULES 2016



DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA CUKAI PENDAPATAN 1967

KAEDAH-KAEDAH CUKAI PENDAPATAN (POTONGAN BAGI PELABURAN DALAM
AKTIVITI YANG LAYAK) 2016

PADA menjalankan kuasa yang diberikan oleh perenggan 154(1)(b) dibaca bersama dengan perenggan 33(1)(d) Akta Cukai Pendapatan 1967 [*Akta 53*], Menteri membuat kaedah-kaedah yang berikut:

Nama dan permulaan kuat kuasa

1. (1) Kaedah-kaedah ini bolehlah dinamakan **Kaedah-Kaedah Cukai Pendapatan (Potongan bagi Pelaburan dalam Aktiviti yang Layak) 2016**.

(2) Kaedah-Kaedah ini disifatkan telah mula berkuat kuasa pada 13 Jun 2008.

Aktiviti yang layak

2. Aktiviti yang layak yang disebut dalam Kaedah-Kaedah ini ialah aktiviti yang dinyatakan dalam ruang (2) Jadual—

(a) yang dijalankan oleh syarikat berkaitan;

(b) yang tidak sama jenisnya dengan aktiviti yang pernah dijalankan oleh syarikat berkaitan pada tarikh permohonan yang disebut dalam subkaedah 6(2); dan

(c) yang diberikan pengecualian di bawah—

(i) Perintah Cukai Pendapatan (Pengecualian) (No. 4) 2016 [*P.U. (A) 157/2016*];

(ii) Perintah Cukai Pendapatan (Pengecualian) (No. 5) 2016 [*P.U. (A) 158/2016*];

(iii) Perintah Cukai Pendapatan (Pengecualian) (No. 6) 2016
[*P.U. (A) 159/2016*]; atau

(iv) Perintah Cukai Pendapatan (Pengecualian) (No. 7) 2016
[*P.U. (A) 160/2016*].

Orang yang layak

3. Orang yang layak yang disebut dalam Kaedah-Kaedah ini ialah suatu syarikat—

(a) yang diperbadankan di bawah Akta Syarikat 1965 [*Akta 125*] dan bermastautin di Malaysia; dan

(b) yang membuat pelaburan dalam syarikat berkaitan.

Pelaburan

4. Pelaburan yang disebut dalam Kaedah-Kaedah ini ialah pelaburan yang dibuat—

(a) dalam bentuk—

(i) sumbangan wang tunai yang syarikat berkaitan tidak mempunyai tanggungan untuk membayar balik; atau

(ii) modal berbayar berkenaan dengan saham biasa dalam syarikat berkaitan;

(b) bagi maksud semata-mata untuk membiayai suatu aktiviti yang layak;

(c) bagi suatu tempoh dan sehingga suatu amaun sebagaimana yang diluluskan oleh Menteri; dan

- (d) dalam tempoh asas bagi tahun taksiran yang sama dengan tahun taksiran yang syarikat berkaitan telah melakukan perbelanjaan dalam menjalankan aktiviti yang layak.

Syarikat berkaitan

5. Syarikat berkaitan yang disebut dalam Kaedah-Kaedah ini ialah suatu syarikat—

- (a) yang diperbadankan di bawah Akta Syarikat 1965 dan bermastautin di Malaysia; dan
- (b) yang sekurang-kurangnya tujuh puluh peratus daripada modal berbayar berkenaan dengan saham biasanya dimiliki secara langsung oleh orang yang layak.

Potongan

6. (1) Tertakluk kepada kaedah 7, bagi maksud menentukan pendapatan larasan orang yang layak daripada perniagaannya dalam tempoh asas bagi suatu tahun taksiran, suatu potongan hendaklah dibenarkan bagi nilai pelaburan yang dibuat oleh orang yang layak itu dalam tempoh asas itu yang bersamaan dengan amaun yang dilakukan oleh syarikat berkaitan dalam tempoh asas itu berhubung dengan aktiviti yang layak yang berkenaan dengannya pelaburan dibuat.

(2) Permohonan untuk potongan di bawah subkaedah (1) hendaklah dibuat oleh orang yang layak kepada Menteri melalui Majlis Pembangunan Wilayah Ekonomi Pantai Timur pada atau selepas 13 Jun 2008 tetapi tidak lewat daripada 31 Disember 2020 dan hendaklah dikemukakan serentak dengan permohonan oleh syarikat berkaitan bagi aktiviti yang layak itu diberikan pengecualian di bawah perintah yang disebut dalam perenggan 2(c).

(3) Bagi maksud subkaedah (2), “Majlis Pembangunan Wilayah Ekonomi Pantai Timur” ertinya suatu majlis yang ditubuhkan di bawah Akta Majlis Pembangunan Wilayah Ekonomi Pantai Timur 2008 [*Akta 688*].

Penarikan balik potongan

7. (1) Potongan yang dibenarkan di bawah subkaedah 6(1) kepada orang yang layak yang membuat suatu pelaburan dalam bentuk modal berbayar berkenaan dengan saham biasa dalam syarikat berkaitan hendaklah ditarik balik jika orang yang layak itu—

(a) melupuskan modal berbayar berkenaan dengan saham biasa itu dalam tempoh lima tahun dari tarikh pelaburan terakhir dibuat; dan

(b) menerima apa-apa balasan bagi pelupusan itu.

(2) Penarikan balik potongan di bawah subkaedah (1) hendaklah dibuat dengan menambah nilai balasan yang diterima dalam menentukan pendapatan larasan orang yang layak itu bagi tahun taksiran dalam tempoh asas yang balasan itu diterima.

(3) Nilai balasan yang ditambah menurut subkaedah (2) tidak boleh melebihi jumlah keseluruhan potongan yang dibenarkan berhubung dengan pelaburan itu.

Pemberhentian potongan

8. Potongan yang dibenarkan kepada orang yang layak di bawah kaedah 6 hendaklah dihentikan dalam tempoh asas bagi suatu tahun taksiran apabila syarikat berkaitan mendapat pendapatan berkanun pertamanya daripada aktiviti yang layak yang berkenaan dengannya pelaburan dibuat oleh orang yang layak itu.

Ketidakpakaian

9. Kaedah-Kaedah ini tidak terpakai bagi orang yang layak sekiranya—

(a) aktiviti yang layak, yang berkenaan dengannya pelaburan dibuat oleh orang yang layak, dimulakan oleh syarikat berkaitan selepas satu tahun dari tarikh kelulusan oleh Menteri atau selepas apa-apa tempoh yang dilanjutkan sebagaimana yang diluluskan oleh Menteri; atau